

日本書紀 卷第四 欠史八代紀

[綏靖] [安寧] [懿德] [孝昭] [孝安] [孝靈] [孝元] [開化]

神淳名川耳天皇 綏靖天皇

一.神淳名川耳天皇 綏靖天皇

神淳名川耳天皇,神日本磐余彥天皇第三子也.母曰-媛蹈備五十鈴媛命,事代主神之次女也.天皇風姿岐嶷,少有雄拔之氣.及壯容貌魁偉,武藝過人而志向沈毅.

至四十八歲,神日本磐余彥天皇崩.時神淳名川耳尊孝性純深,悲慕無已.特留心於喪葬之事焉.其庶兄手研耳命行年已長,久歷朝機.故亦委事而親之.然,其王立操屠懷,本乖仁義,遂以諒闇之際,威福自由.苞藏禍心,圖害二弟.于時也,太歲己卯.

冬十一月,神淳名川耳尊與兄-神八井耳命陰知其志而善防之.至於山陵事畢,乃使弓部-稚彥,造弓;倭鍛部-天津真浦,造真覽鏃;矢部,作箭.

及弓矢既成,神淳名川耳尊欲以射殺手研耳命.會有手研耳命於片丘大窖中,獨臥于大床.時神淳名川耳尊謂神八井耳命曰:「今適其時也!夫,言貴密,事宜慎,故,我之陰謀,本無預者.今日之事,唯吾與爾自行之耳.吾當先開窖戶,爾其射之!」因相隨進入,神淳名川耳尊突開其戶,神八井耳命則手腳戰慄,不能放矢.

時神淳名川耳尊,擊取其兄所持弓矢而射手研耳命.一發中胸,再發中背,遂殺之.

於是神八井耳命慙然自服,讓於神淳名川耳尊曰:「吾是乃兄而懦弱不能致果.今汝特挺神武,自誅元惡.宜哉乎!汝之光臨天位以承皇祖之業.吾當為汝輔之,奉典神祇者.」是即多臣之始祖也.

元年春正月,壬申朔己卯,神淳名川耳尊即天皇位.都葛城,是謂高丘宮.

尊皇后曰-皇太后.是年也,太歲庚辰.

二年春正月,立五十鈴依媛為皇后,一書云,磯城縣主女-川派媛;一書云,春日縣主大日諸女-絲織媛也.即天皇之姨也.

后生,磯城津彥玉手看天皇.

四年夏四月,神八井耳命薨.即葬于畝傍山北.

二十五年春正月,壬午朔戊子,立皇子磯城津彥玉手看尊為皇太子.

三十三年夏五月,天皇不豫.

癸酉,崩.時年八十四.



片丘
神淳名川耳尊射殺手研耳命於片丘大窖中.今奈良縣北葛城郡王寺町.




葛城高丘宮跡
綏靖天皇都葛城,是謂高丘宮.



畝傍山
神八井耳命薨.即葬于畝傍山北.

磯城津彥玉手看天皇 安寧天皇

一.磯城津彥玉手看天皇 安寧天皇



神淳名川耳天皇,桃花鳥田丘上陵.



石園座多久虫玉神社 亦,龍王宮.
傳為安寧天皇片鹽浮孔宮跡地.

磯城津彥玉手看天皇,神淳名川耳天皇太子也.母曰-五十鈴依媛命,事代主神之少女也.天皇以神淳名川耳天皇二十五年,立為皇太子.年二十一.

三十三年夏五月,神淳名川耳天皇崩.

其年七月,癸亥朔乙丑,太子即天皇位.

元年冬十月,丙戌朔丙申,葬神淳名川耳天皇於倭桃花鳥田丘上陵.

尊皇后曰-皇太后.是年也,太歲癸丑.

二年,遷都於片鹽,是謂浮孔宮.

三年春正月,戊寅朔壬午,立淳名底仲媛命,亦曰-淳名襲媛.為皇后.一書云,磯城縣主葉江女-川津媛;一書云,大間宿禰女-絲井媛.先,是后生二皇子.

第一曰,息石耳命.

第二曰,大日本彥耜友天皇.一云,生三皇子:第一曰-常津彥某兄,第二曰-大日本彥耜友天皇,第三曰-磯城津彥命.

十一年春正月,壬戌朔,立大日本彥耜友尊為皇太子也.

弟-津城津彥命,是豬使連之始祖也.

三十八年冬十二月,庚戌朔乙卯,天皇崩.時年五十七.


大日本彥耜友天皇 懿德天皇

一.大日本彥耜友天皇 懿德天皇

大日本彥耜友天皇,磯城津彥玉手看天皇第二子也.母曰-淳名底仲媛命,事代主神孫-鴨王女也.

磯城津彥玉手看天皇十一年春正月,壬戌,立為皇太子.年十六.
三十八年冬十二月,磯城津彥玉手看天皇崩.
元年春二月,己酉朔壬子,皇太子即天皇位.
秋八月,丙午朔,葬磯城津彥玉手看天皇於畝傍山南御陰井上陵.
九月,丙子朔乙丑,尊皇后曰-皇太后.是年也,太歲辛卯.
二年春正月,甲戌朔戊寅,遷都於輕地,是謂曲峽宮.
二月,癸卯朔癸丑,立天豐津媛命為皇后.一云,磯城縣主葉江男弟-豬手女-泉媛;一云,磯城縣主太真稚彥女-飯日媛也.

后生,觀松彥香殖稻天皇.一云,天皇母弟-武石彥奇友背命.
二十二年春二月,丁未朔戊午,立觀松彥香殖稻尊為皇太子.年十八.
三十四年秋九月,甲子朔辛未,天皇崩.




安寧天皇 畝傍山西南御陰井上陵



牟佐坐神社
有傳為懿德天皇輕之曲峽宮跡地.
一般視作孝元天皇輕之境原宮跡地.

觀松彥香殖稻天皇 孝昭天皇

一.觀松彥香殖稻天皇 孝昭天皇



懿德天皇 畝傍山南織沙谿上陵



掖上
孝昭天皇遷都掖上池心宮.

觀松彥香殖稻天皇,大日本彥耜友天皇太子也.母皇后-天豐津媛命,息石耳命之女也.
天皇以大日本彥耜友天皇二十二年春二月,丁未朔戊午,立為皇太子.
三十四年秋九月,大日本彥耜友天皇崩.

明年冬十月,戊午朔庚午,葬大日本彥耜友天皇於畝傍山南織沙谿上陵.
元年春正月,丙戌朔甲午,皇太子即天皇位.
夏四月,乙卯朔己巳,尊皇后曰-皇太后.
秋七月,遷都於掖上,是謂池心宮.
二十九年春正月,甲辰朔丙午,立世襲足媛為皇后.一云,磯城縣主葉江女-淳名城津媛;一云,倭國豐秋狹太媛女-大井媛也.

后生,天足彥國押人命、日本足彥國押人天皇.
六十八年春正月,丁亥朔庚子,立日本足彥國押人尊為皇太子.年二十.
天足彥國押人命,此和珥臣等始祖也.
八十三年秋八月,丁巳朔辛酉,天皇崩.

日本足彥國押人天皇 孝安天皇

一.日本足彥國押人天皇 孝安天皇

日本足彥國押人天皇,觀松彥香殖稻天皇第二子也.母曰-世襲足媛,尾張連遠祖-瀛津世襲之妹也.

天皇以觀松彥香殖稻天皇六十八年春正月,立為皇太子.
八十三年秋八月,觀松彥香殖稻天皇崩.
元年春正月,乙酉朔辛亥,皇太子即天皇位.
秋八月,辛巳朔,尊皇后曰-皇太后.是年也,太歲己丑.
二年冬十月,遷都於室地,是謂秋津島宮.
二十六年春二月,乙丑朔壬寅,立姪-押媛為皇后.一云,磯城縣主葉江女-長媛;一云,十市縣主五十阪彥女-五十阪媛也.

后生,大日本根子彥太瓊天皇.
三十八年秋八月,丙子朔己丑,葬觀松彥香殖稻天皇于掖上博多山上陵.
七十六年春正月,己巳朔癸酉,立大日本根子彥太瓊尊為皇太子.年二十六.
百二年春正月,戊戌朔丙午,天皇崩.



宮山古墳 孝安天皇室秋津島宮跡碑



卅八年,孝昭天皇葬掖上博多山上陵

大日本根子彥太瓊天皇 孝靈天皇


一.大日本根子彥太瓊天皇 孝靈天皇



孝安天皇 玉手丘上陵
孝安天皇百二年秋九月,日本足彥國押人天皇,葬于玉手丘上陵也。

大日本根子彥太瓊天皇,日本足彥國押人天皇太子也。母曰-押媛,蓋天足彥國押人命之女乎。天皇以日本足彥國押人天皇七十六年春正月,立為皇太子。百二年春正月,日本足彥國押人天皇崩。秋九月,甲午朔丙午,葬日本足彥國押人天皇于玉手丘上陵。冬十二月,癸亥朔丙寅,皇太子遷都於黑田,是謂廬戶宮。元年春正月,壬辰朔癸卯,太子即天皇位。尊皇后曰-皇太后,是年也,太歲辛未。二年春二月,丙辰朔丙寅,立細媛命為皇后。一云,春日千乳早山香媛;一云,十市縣主等祖-真舌媛也。后生,大日本根子彥國牽天皇。

妃-倭國香媛,亦名,緩某姊。
生,倭跡跡日百襲姬命、彥五十狹芹彥命,亦名,吉備津彥命、倭跡跡稚屋姬命。亦,妃-緩某弟。
生,彥狹島命、稚五彥命。
弟,稚五彥命,是吉備臣之始祖也。
三十六年春正月,己亥朔,立彥國牽尊為皇太子。
七十六年春二月,丙午朔癸丑,天皇崩。



孝靈神社 亦名,廬戶神社
傳為孝靈天皇黑田廬戶宮跡。

大日本根子彥國牽天皇 孝元天皇

一.大日本根子彥國牽天皇 孝元天皇

大日本根子彥國牽天皇,大日本根子彥太瓊天皇太子也。母曰-細媛命,磯城縣主大目之女也。天皇以大日本根子彥太瓊天皇三十六年春正月,立為皇太子。年十九。七十六年春二月,大日本根子彥太瓊天皇崩。元年春正月,辛未朔甲申,太子即天皇位。尊皇后曰-皇太后,是年也,太歲丁亥。四年春三月,甲申朔甲午,遷都於輕地,是謂境原宮。六年秋九月,戊戌朔癸卯,葬大日本根子彥太瓊天皇于片丘馬阪陵。七年春二月,丙寅朔丁卯,立鬱色謎命為皇后。后生二男一女。
第一曰,大彥命。
第二曰,稚日本根子彥大日日天皇。
第三曰,倭跡跡姬命。一云,天皇母弟-少彥男辛命也。
妃-伊香色謎命。
生,彥太忍信命。
次妃-河內青玉繫女埴安媛。
生,武埴安彥命。
兄-大彥命,是阿倍臣、膳臣、阿閉臣、狹狹城山君、筑紫國造、越國造、伊賀臣,凡七族之始祖也。
彥太忍信命,是武內宿禰之祖父也。
二十二年春正月,己巳朔壬午,立稚日本根子彥大日日尊為皇太子。年十六。
五十七年秋九月,壬申朔癸酉,大日本根子彥國牽天皇崩。




孝靈天皇 片丘馬阪陵
孝元天皇六年,葬大日本根子彥太瓊(孝靈)天皇於片丘馬阪陵。



牟佐坐神社
據傳是為大日本根子彥國牽(孝元)天皇輕地境原宮之跡地也。


稚日本根子彥大日日天皇 開化天皇

一.稚日本根子彥大日日天皇 開化天皇




率川神社
春日率川宮位於此社附近。

稚日本根子彥大日日天皇,大日本根子彥國牽天皇第二子也。母曰-鬱色謎命,穗積臣遠祖-鬱色雄命妹也。天皇以大日本根子彥國牽天皇二十二年春正月,立為皇太子。年十六。五十七年秋九月,大日本根子彥國牽天皇崩。冬十一月,辛未朔壬午,太子即天皇位。元年春正月,庚午朔癸酉,尊皇后曰-皇太后。冬十月,丙申朔戊申,遷都于春日之地,春日,此云 春。是謂率川宮,率川,此云 率。是年也,太歲甲申。



大日本根子彥國牽天皇 劍池島上陵



開化天皇 春日率川阪本陵

五年春二月,丁未朔壬子,葬大日本根子彥國牽天皇于劍池島上陵。
六年春正月,辛丑朔甲寅,立伊香色謎命爲皇后,是庶母也。
后生,御間城入彥五十瓊殖天皇。
先是天皇納丹波竹野媛爲妃。
生,產湯產隅命,亦名,彥蔣實命。
次,妃和珥臣遠祖-姥津命之妹-姥津媛。
生,彥坐王。
二十八年春正月,癸巳朔丁酉,立御間城入彥尊爲皇太子,年十九。
六十年夏四月,丙辰朔甲子,天皇崩。
冬十月,癸丑朔乙卯,葬于春日率川阪本陵,一云,阪上陵,時年百十五。

日本書紀卷第四 終

[\[久遠 絆\]](#) [\[卷第三\]](#) [\[卷第五\]](#) [\[再臨詔\]](#)